

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: E Piti Toata i te Matahiti.

Nu. 12

Ditema 1934

Mat. 29


*“Te vai mau nei te hoê ture i haamauhia i te ra'i ra,
e tei nia i taua ture ra, te faatiaraa i te mau haamaitairaa
atoa; e ia noaa mai ia tatou nei, te maitai no ô mai i te Atua
ra, ua na roto ia i te haapao maitai i taua ture tumu ra.”*

B. F. 130:20, 21; 88:36-45; 132:5.

Melavina J. Balada.


Ua fanau mai o Melavina J. Balada i te 9 no Febuare
i te matahiti 1873 i te Oire Logan i te tufaa fenua
ra Utaha. Mai to'na apîraa ua haapiihia oia i te mau haa-
piiraa no te Ekalesia. Ua faatere o Henere Balada, to'na
metua tane, i to ratou amaa e 40 matahiti, e to'na metua
vahine o Mata a Balada o tei faatere i te ohipa no te mau
tuahine e 30 matahiti.

Te ohipa matamua ta Melavina i rave tei nia ia i te
faaapu, ua haere oia i te mau haapiiraa, e ua noaa mai ia'na
ta'na parau no te haapiiraa teitei, e ia mahiti mai oia, mai



E hoho'a teie no te hoê Apotesolo o MELAVINA J.

BALADA.



roto mai i taua haapiiraa ra, ua riro oia ei orometua, e ua haamata'atoa oia i te chipa raraa ahū i te oire Logan, e ua manuia taua ohipa ra. Noa'tu i te rahi raa o ta'na ohipa ua haamana'o maite oia i ta'na mau pure raa e te ohipa a te Atua, e no te neheneheraa o to'na reo e no to'na ite rahi i te mau haapiiraa no te Ekalesia, eita te taata e fiu i te faaroo raa i ta'na mau a'oraa, e ua anihia oia i te mau taime atoa ia haere i tera vahi e i tera vahi ia a'o atu i te Evanelia.

I te 6 no Eperera i te matahiti 1909 ua maitihia oia ei Peretiteni no te misioni no te Ekalesia i te tufaa Apatoerau, e i raro a'e i ta'na faatere raa ua tupu roa te ohipa i taua misioni ra, e 10 matahiti te maoro no ta'na faatereraa i te ohipa no taua misioni ra.

I te 7 no Tenuare i te matahiti 1919 ua maitihia oia ei Aposetolo no te Ekalesia e mai taua mahana ra e tae roa mai i teie nei, ua rave itoito oia i ta'na ohipa, e aita te hoê taata, i roto i te Ekalesia, e tia ia'na ia a'o atu i te Evanelia mai ia Melavina te huru, e e haere mai te mau taata no te mau vahi atea roa ia faaroo i ta'na mau a'o raa.

I te 3 no Tetepa i te matahiti 1925 ua maitihia o Melavina, Rulona S. Vera, e o Re L. Parata ia haere i te fenua Amerika Apatoa ia haamaitai i taua fenua ra no te ohipa a te Atua e ia haamata atoa i te ohipa i reira. Ua tae ratou i reira i te 6 no Titema, e i te 25 no Titema i roto i te hoê uru raau ua haamaitai oia i taua fenua no te ohipa a te Atua. E i teie nei e mea tupu roa te ohipa a te Ekalesia i reira.

I te 17 no Tiunu i te matahiti 1896 ua faaipoipo oia ia Martha A. Jones e ua fanau mai ta raua e too vau tamarii e te rave nei ratou i te ohipa i roto i te Ekalesia.

“To’na maramarama, ua anaana ia i mua te aro o te taata nei, e ua hi’o ratou i ta’na parau e ta’na ohipa maitai e ua haamaitai i to ratou Metua i te ao ra.”

“O te nehenehe o te avae o te feia i hopoi mai i te oaoa o te hau e, o tei hopoi mai i te evanelia o tei maitai ra e.” 10:15 Isa. 52-7.

Papahia e Leroi Marori.

Te Ekalesia I Faatihia E Iesu Mesia

Ehoma, i teie mau mahana nei, te vai nei te mau haapaoraa e rave rahi i nia i te ao nei. Te parau nei te hoê haapaoraa, “Teie te haapaoraa mau” e na reira atoa te tahi e te tahi, ia tae roa i te hopea o taua mau haapaoraa ra.

I te oraraa o te Mesia i nia i te ao nei ua faatia oia i ta’na Ekalesia na roto i ta’na mau aposetolo e ta’na mau tavini. E ua faatoroa hia te mau taata faatere i roto i taua Ekalesia ra. E ua haapiihia te mau haapiiraa a te Mesia i reira. Te vai nei te faaiteraa o taua ohipa ra i rotopu ia ta’ou atoa i teie mau mahana nei, oia hoi “Te Bibilia”.

No reira e homa a rave tatou i ta tatou mau Bibilia e e hi’o tatou i te huru o taua Ekalesia i faatihia e te Mesia. E hi’o atoa tatou i te huru o ta tatou haapaoraa, e mai te mea e, hoê a huru i te mau toroa, te mau haapiiraa, e te mau ohipa i ravehia i roto i ta tatou haapaoraa e te reira i roto i te Ekalesia i faatihia e te Mesia, e riro te reira ei faaiteraa papu roa te reira te Ekalesia mau, oia hoi te Ekalesia na te Mesia.

Teie ia te huru o te Ekalesia i faatiahia e te Mesia i to'na oraraa:

I- TE IO'A NO TE EKALESIA: "Te Ekalesia a Iesu Mesia. A hi'o (Eph. 5:24-24; Ohipa 4:10-12.) Aore roa e au vetahi io'a no te Ekalesia a te Mesia.

II- TE MAU TOROA NO TE EKALESIA A TE MESIA: Te mau Aposetolo (12), te mau Peropheta, te mau Tahu'a Rahi, te mau Patereareha, te mau Hitu ahuru, te mau Peresibutero, te mau Tahu'a, te mau Haapii, te mau Diakono, te mau Epi-sekopo, e te mau taata toe ua parauhia ratou, te mau melo aore ra te feia mo'a. Ahi'o (Eph. 2:19-22; 4:8-14; I Kor. 12:27-29; I Tim. 3:10.)

III- TE FEIA I FAATOROAHIA: Mea nafea to ratou maitiraa? Teie ia, ua maitihia ratou na roto i te heheuraa a te Atua, aore ra ua maitihia ratou e te feia toroa i roto i te Ekalesia. A hi'o, (Heb. 5:4; Mar. 3:14-15; Ioa. 15:16, Rom. 10:14-15.)

Mea nafea to ratou faatoroaraa? Teie ia, ua faatoroahia ratou e te tuuraa o te rima o te feia toroa no te Ekalesia. Tei ia ratou atoa te mana no to ratou toroa ana'e. (Ohipa 6:5-6; 13:1-3; Num. 27:18-32.)

IV- TE MONI NO TE EKALESIA: (1) Nahea te roaraa mai te moni no te Ekalesia? Teie ia, ua roaa mai na roto i te tufaa ahuru o te tao'a no te mau melo, e te tao'a aufau no te feia mo'a. Ahi'o, (Mal. 3:7-10; Heb. 7:1-2; Rev. 27:30-34; Mat. 23:23; I Kor. 16:12.) Aore roa i titauhia te moni i te mau taata i roto i te mau fare pureraa.

(2) Eaha te ohipa i ravehia i te moni no te Ekalesia? Teie ia, ua ravehia taua moni ra no te faatereraa i te Ekalesia, no te faatiaraa i te mau fare pureraa, e no te tautururaa i te feia vêvê.

V- TE MAU HAAPIIRAA NO TE MESIA:

(1) Te Faaroo, oia hoi te faaroo i te Atua Metua e i ta'na Tamaiti ia Iesu Mesia, e i te Varua Maitai. Ua taa e te tahi i te tahi. A hi'o, (Gen. 1:26-27; Exo. 24:9-11; Heb. 1:1-4; Phil. 2:5-8) E hoho'a mau o Iesu no to'na Metua.

(2) Te Tatarahapa: I muri a'e i te faaroo mau ua tae mai te tatarahapa. Oia hoi te haapaeraa i te mau mea ino e te raveraa i te mau mea maitatai. Ua faaorehia te ino na roto i te raveraa i te maitai. A hi'o, (Mat. 3:1-2; Mar. 1:14,15; 6:7-12; Ohipa 2:38; 3:16.)

(3) Te Bapetizoraa i te Pape: (a) Nafea e no te aha te bapetizoraa? Teie ia, te bapetizoraa utuhi no te matara-raa i te mau hara. Ua ravehia taua ohipa ra e te feia toroa a te Atua. A hi'o (Ohipa; 2:38; Mat. 3:13-17; Mar. 16:15-16; Ioa. 3:23; Ohipa. 19:1-5; 16:30-34.) (b) Ua ravehia te bapetizoraa na vai? Teie ia, ua ravehia te bapetizoraa na te feia faaroo, e te feia i tatarahapa. Oia hoi na te feia o tei ite i te ino e te maitai no reira aore roa i bapetizohia te mau aiu e te mau tamarii rii. A hi'o, (Mat. 18:1-7, 10; 19:14-15.) Ua haapiihia te oroa bapetizo no te feia o tei pohe na mua i to ratou iteraa i te Evanelia. (Ioa. 3:5; I Pet. 3:18-20; 4:6; I Kor. 14:29.)

(4) Te fanauraa i te Varua. (a) I nahea, e nafea, e no te aha te fanauraa Varua? Teie ia: Na muri te bapetizoraa Varua i te bapetizoraa pape e ua ravehia taua oroa ra na roto i te tuuraa rima o te feia toroa, no te horoa raa i te Varua Maitai. (Ohipa 2:38,39; 19:1-7). E aratai te Varua maitai i te mau taata i te parau tia e e haapii ia ratou i te parau mau. E e tauturuhia te feia o tei roaa mai i te Varua Maitai ia faaora i te feia ma'i atoa. (Ioa. 14:17-18; I Kor. 12; Ohipa. 8:14-17.)

(5) Te Oroa o te Fatu; Oia hoi te amuraa i te pane e te inuraa i te uaina, aore ra e pape ei haamana'oraa i te poheraa o te Mesia. (Luk. 22:7-20; I Kor. 11:23-34.)

(6) No te raveraa i te Ohipa Maitai. Ua haapiihia te raveraa i te ohipa maitai e Iesu na roto i ta'na mau parau e ta'na mau ohipa. "Te faaroo ma te ohipa ore e mea pohe ia." (Iak. 1:22-25; 2:14-26; Ioa. 7:16-17; 14:12-21; Apok. 20:12.)

(7) Te Heheuraa: Aita roa e ore i te Atua i te ho-roa i te heheuraa i ta'na Ekalesia. E faaterehia e e aratai-hia te Ekalesia a Iesu Mesia na roto i te heheuraa. (Apok. 14:6; Mat. 16:17-18; Amo. 3:7-8; Luk. 10:22.)

E homa, te vai noa ra te rahi o te parau i roto i te Bibilia, no te faaiteraa i te huru no te Ekalesia a te Mesia, area ra mai te mea e, e taio maitai tatou i te mau irava i faa-itehia i nia nei, e e feruri maitai i taua mau parau ra, e navai roa te reira no te haapapuraa i to tatou mau mana'o. Tei hia te Ekalesia mau a te Mesia?

Na o mai te parau i papaihia, "E ore te taata e ora i te maa ana'e ra, i te mau mea atoa ra i haapaohia e te Atua." (Mat. 4:4) No reira e homa, ua haapaohia te mau toroa, te mau oroa, te mau haapiiraa e te mau ohipa atoa i roto i te Ekalesia a te Mesia ei mau mea faaora no te taata, e e mai te mea e, e hinaaro tatou i te ora, ia haapao tatou i taua mau mea atoa ra e tia'i.

Papaihia e Ioane.

Te Mau Parau A Te Peropheta

(E tuatiraa teie nei parau.)

Te Buka a Moromona ra, o te tuatapaparaa parau ia no Epheraima e no Manase hoi, mai tei faaitehia i raro nei te huru.

O Lehi, e huaai oia na Manase, e o Manase o te tamaiti ia na Iosepha o tei hoohia'tu i to Aiphiti. Alama 10:3; I Nephi 6:3; I Nephi 5:14.

O Isemaela, e huaai ia na Epheraima.

Ua faaipoipohia te mau tamarii a Lehi ma i te mau tamahine a Isemaela.

Uiraa. 47.

O vai ia te raau no Iuda ta Ezekielia i parau maira e e riro ei hoê raau i roto i to Iehova ra rima?

Pahonoraa 47.

O te Bibilia ia te raau no Iuda ta Ezekielia i parau maira, e taati atu ai i te raau no Iosepha e na Epheraima ia riro ratou ei hoê.

Ua papu roa ia tatou e te Buka Moromona ra, o te raau ia i roto i te rima o Epheraima mai tei faaitehia i nia nei te huru e mai ta te Atua hoi i parau na e e taati atu aite Buka a Moromona i te Bibilia. Ua tupu mau taua tohu ra i teie nei mau mahana hopea nei na roto i te taeraa mai te Buka a Moromona ei taatiraa i te Bibilia ra.

Papaihia e Mohi a Makitua.

To Tatou Taeae I Te Faaroo No Samoa.

Ua faati'ahia te Misioni no te Ekalesia a Iesu Mesia i te Feia Mo'a i te Mau Mahana Hopea nei, i nia i te motu ra o Tutuila, i te fenua Samoa, e Iosepha Henere Dean, i te 18 no tiunu i te matahiti 1888.

I te hopea o te matahiti 1900 te vai ra, i nia i taua motu ra o Tutuila, e 9 Orometua apî, no te Momoni, o tei haapii atu i te mau taata no taua fenna ra, i te Evanelia o te Mesia e te reo Baratane atoa hoi.

Te Haapiiraa Mapusaga. I te matahiti 1900 ua ani te Peresideni no te Misioni no te Ekalesia, i te mau taata no te oire ra o Faleniu, ia horoa mai ratou i te hoê vahi fenua no te te faatiaraa i te hoê fare haapiiraa. Ua horoa te huiraa-tira i te vahi fenua no te faatiaraa i te fare haapiiraa e te fare pureraa atoa hoi, e ua topahia te i'oa o taua vahi ra o "Mapusaga" (*E vahi faaearea.*)

I te otiraa o te fare haapiiraa ua tae te mau tamarii tei haere i reira i te 67, e 35 tamaroa e e 32 tamahine. I rotopu ia ratou te vai ra te mau tamarii mei te 6 matahiti e tae noa'tu i te taurearea tei tae i te 20 o te matahiti; no te mau vahi atoa ratou no te fenua Samoa, e ua haere mai ratou i reira, e to ratou atoa mau fetii, e ua haapao maitai hia ratou i reira.

Te vai ra, i roto i te reira fare Haapiiraa, e ono haapiiraa tei faatere hia e te hoê Orometua papaa ma te tauturu hia e na taata Samoa e toru. Ua faaterehia te reira haapiiraa e 4 mahana i hebedoma mai te haamata i te hora 8 e te afa i te poipoi e te faaoti i te hora 12 e te afa i te avatea. I roto i te reira mau hora e haapiihia te mau tamarii i te reo Baratane, te taioraa, te numera, te otarafia, te papai e te mau nota upaupa.

Ia noaa te ite i te mau tamarii i taua Haapiiraa ra, e riro ratou ei Orometua i roto i te mau oire rii.

I teie nei te haere noa nei teie haapiiraa i mua, e te vai nei, i teie nei i roto ia Mapusaga, 100 tamaroa e e 50 tamahine. Te vai atoa ra i reira te hoê pūpū pū nehenehe roa, e ua tarahu matahiti hia, e te Feia Faatere no te Haapiiraa te hoê fenua rahi faaapu, e tae i te 300 ta, o tei hau roa i te maitai i te motu ra o Tutuila.

TE PAHI RA O "ZACA" I PAPEETE.

E maha matahiti i mairi a'enei, ua tae ae ra te pahi ra o "Zaca" e to'na atoa ra Fatu o Mr. Templeton Crocker i te fenua ra o Samoa. I to ratou tae raa i Samoa ua iti te mau taata rave ohipa i nia iho i taua pahi no reira ua tihepu matou, e toru taure'are'a no Samoa i nia i taua pahi ra no te haere e faaati i teie nei ao. Ua faarue matou i reira i te 14 no Atete i te matahiti 1930.

E piti a'enei to'u tere faahouraa e taua taata ra o Mr. Templeton Crocker, na muri a'e i to matou faaatiraa i teie nei ao, hoê i te mau motu Galapagos, i America i ropu e i te fenua Mexico; i te matahiti i mairi a'enei ua haere matou i te mau fenua Salomona e a tere ai matou i reira ua tapae matou i te motu ra o Oahu. Vaihi, e ua haere matou i te oire ra o Honolulu e te vahi faaheeraa miti tuiroo ra o Waikiki. Mai reira ua tere matou i te mau fenua Samoa e te fenua Fiti atoa.

I teie tere ra, ua faarue matou i te oire ra o San Francisco, Tarafonia, i te 15 no Setepa i mairi a'enei no te haere mai na Nuuhiva, e te Tuamotu i Tahiti nei.

I to matou tae raa i Hao, ua farerei au i na Orometua Momoni e piti, no America mai. Ua oaoa roa vau i te farerei faahou raa i te Feia Mo'a. I to'u haereraa i ta ratou Pureraa oro'a, ua ani mai o Ture (Elder L.L. Turley) raua o

Lui (Elder Lewis A. Carlile) ia paraparau rii matou. E mea papu roa e, ua i roa vau i te oaoa no te mau hora rii ta matou i haapau i te paraparau raa, eiaha ia raua ana'e, i te mau melo atoa ra o te Ekalesia e ia I'u â Keha e ta'na vahine, no te mea no raua te fare tei parahihia e na orometua.

Te po Sabati te po hopea ta'u i parahi i Hao; ua haere vau i uta i taua pô ra e ua parau haere matou no te huru o te mau fenua o teie nei ao, te huru no te haapiiraa o te Ekalesia i America, i Samoa e i te mau vahi atoa ta'u i haere. I te taima to'u faarue raa ia ratou no te haere i nia i te pahi, ua haere mai ratou atoa i nia i te uahu e ua himene ratou i te hoê himene no to'u revaraa. I reira ua na ô maira te Orometua ra o Ture, "E Pemasa ua papu roa ia'u e, e oaoa oe i to oe faacaraa i Papeete, no te mea te vai ra, i reira, te hoê taata maitai roa i reira e ta'na vahine, oia hoi o LeRoi Peresideni e ta'na vahine o Muria".

Ua tae mai matou i Papeete nei i te 9 no Novema e hoê hora i muri a'e i to matou taeraa mai ua haere au i uta e ua imi au i te fare o te mau Orometua Momoni, e iteahia a'era te reira e ua tomo atu vau i roto i taua fare ra e ua fariihia vau ma te oaoa e te aroha mau.

I te Sabati i muri iho ua haere au i te pureraa Autahu'araa e te pureraa Oro'a atoa hoi, e i reira ua ani mai te Peresideni ra o LeRoi ia faaite mai i to'u mana'o i mua i te Amuiraa e ua na reira vau ma te oaoa.

Ua maere au i te hi'oraa i te rahiraa o te mau melo no te Ekalesia i te haere raamai i te pureraa i te mahana Sabati, no te mea ua mana'o vau, hou to'u taeraa mai, eita paha e rahi te man melo no te Ekalesia i Papeete nei, i te vahiteiparahia, i te fenua America, te "Paradaiso o te mau fenua Moana".

Ua oaoa maitai matou, te mau taata rave ohipa i nia i te "Zaca" i to matou fariiraahia i teie fenua e ua mauruuru roa matou i te reira. Teie ta'u parau hopea, te tiaturi nei au e, e farerei faahou tatou, eita e maoro.

To outou laae i faaroo, Pemasa Utu.

Teie parau i mua nei, ua papaihia e to tatou taeae i te Faaroo o Pemasa Utu no Samoa, Ua fanau mai oia i Samoa e ua paari oia i reira e ua haere oia i te haapiiraa no te Ekalesia i Samoa e e mea itoitoe roa oia i roto i te ohipa no te Ekalesia. E maha matahiti i mairi a'enei ua faarue oia i to'na fenua ai'a e ua haere oia na nia i teie pahi o Zaca ei taata rave ohipa na te taata Ona o te pahi e te reira ta'na ohipa i teie nei â.

Te Mau Parau Api.

Maitihia.

I te Amuiraa Rahi no Atopa tei mairi a'enei, ua maitihia te mono no Anatone Ivini o tei pohe, mai teie te huru o te maitiraahia ua faanuuhia o Reubena Tarati i mua e ua riro oia ei tauturu hoê no te Peretiteni raa rahi no te Ekalesia, e ua maitihia o Davida O. Make, no roto mai i te tino ahuru ma piti Aposetolo, ei tauturu piti no te peretiteni raa. E ua maitihia Alonso Hineckley e Aposetolo ei mono ia Davida Make i roto i taua pupu ra. E ua maiti atoa hia O Rufus K. Hardy ei mono no Tehaere H. Hart tei pohe a'enei i roto i te pupu Peretiseniraa matamua no te mau Hita ahuru no te Ekalesia.

Parau Api.

I roto i te ava'e Atopa ua pohe o Raïymond Poiheare, te Peretiteni no te Hau Farani i te tau no te tamai rahi e ua huna hia oia i te 20 no Atopa, e hunaraa hanahana roa to'na, e taata herehia oia e te mau taata atoa.

Ua Pohe.

I te 29 no Tetepa i mairi a'nei ua pohe Charle H. Hart o te hoê no te Peretiteni raa matamua no te mau hitu ahuru no te Ekalesia. E mea muoro roa oia i roto i taua pupu, e e mea itoitoe oia i te raveraa i ta'na ohipa.

Ture maitai.

Ua opani-roa-hia te mauavaava Cigarettes a te feia puhipuhi avaava i roto i te tufaa i Henan, Tinito. Ua hamanihia te hoê ture i reira i te opani-roa-raa i te avaava i roto i taua tufaa ra. Ua parau te feia faatere i taua tuhaa ra, e e moni rahi roa tei pau i nia i te avaava, e e mea maitai a'e taua moni ra ia haamau'ahia i nia i te tahi ohipa maitai a'e. E e au i te feia toro'a o te hau iana mua ite faaorei teavaava, ei hioraa na tetataa rii.

LOUIS DROLLET Gérant

L. R. MALLORY Imprimeur.

Rue Dumont d'Urville, Orovini, Papeete, Tahiti.